

Dedah maklumat kepentingan awam

TI-M saran pinda Akta Rahsia Rasmi untuk tingkatkan ketelusan kerajaan

Oleh RAIHAM MOHD SANUSI

SHAH ALAM

Transparency International Malaysia (TI-M) mencadangkan agar Akta Rahsia Rasmi 1972 dipinda bagi meningkatkan tahap ketelusan tadbir urus kerajaan seterusnya memperbaiki kedudukan Indeks Persepsi Rasuah (CPI) Malaysia yang jatuh ke tangga 57 dunia bagi 2020.

Presidennya, Dr Muhammad Mohan berkata, kerajaan harus menyempitkan ruang lingkup Akta Rahsia Rasmi agar perkara yang menarik perhatian rakyat misalnya kontrak dirunding secara terus tidak dirahsiakan.

Menurutnya, hanya perkara yang berkaitan dengan kesela-

matan negara wajar dilindungi.

“Kerajaan juga disyorkan membuat kemas kini awam secara berkala mengenai status kes mahkamah berprofil tinggi yang belum selesai.

“Pemantauan terhadap pelaksanaan Pelan Antirasuah Nasional (NAP) dan perlu mengemas kini kemajuan tentang 115 inisiatif yang dilakukan serta ia dihebahkan kepada awam,” katanya.

Beliau berkata demikian ketika melancarkan laporan CPI 2020 secara maya pada Khamis.

Terdahulu Muhammad berkata, berdasarkan analisis oleh TI-M, kejatuhan CPI Malaysia bagi tahun 2020 mungkin disebabkan beberapa faktor termasuk akses terhadap maklumat mengenai kepentingan awam.

Katanya, maklumat mengenai perkara tersebut tidak sepatutnya diletakkan di bawah klausa perjanjian tanpa pendedahan melainkan jika hal itu mempengaruhi keselamatan negara.

“Contoh maklumat yang tidak didedahkan berkaitan pampasan penamatan projek Kereta Api Berkelajuan Tinggi (HSR)



Kerajaan disaran menyempitkan ruang lingkup Akta Rahsia Rasmi agar perkara yang menarik perhatian rakyat misalnya kontrak dirunding secara terus tidak dirahsiakan.

Malaysia-Singapura dan pampasan sebenar yang dibayar oleh Goldman Sachs dalam kes 1MDB (1Malaysia Development Bhd) masih belum diketahuhi,” kata Muhammad.

Muhammad berkata, kerajaan juga dicadangkan memberi kuasa kepada Ketua Setiausaha Negara (KSN) untuk bertanggungjawab terhadap peranan perkhidmatan awam dalam menjayakan dan menca-

pai matlamat NACP.

Jelasnya, kerajaan juga perlu mengamalkan piawai antarabangsa mengenai perjanjian integriti dalam prokumen kerajaan untuk ketelusan dan pemerintahan yang baik.

“Kuasa dan kebebasan juga mesti diberikan kepada Suruhanjaya Integriti Agensi Penguatkuasaan (EAIC).

“Kerajaan juga perlu memberi mandat bahawa Laporan

Ketua Audit Negara mesti dibahaskan di Parlimen dan menjadikan Jabatan Audit Negara hanya bertanggungjawab kepada Parlimen sahaja,” katanya.

Muhammad turut memaklumkan, pihaknya juga berharap kerajaan meminda Akta Suruhanjaya Pencegahan Rasuah Malaysia (SPRM) bagi membolehkan Parlimen melantik Ketua Pesuruhjaya dan memutuskan tempoh jawatannya.

Tegasnya, Akta Perlindungan Pemberi Maklumat 2010 juga harus dipinda untuk menyediakan saluran pelaporan yang lebih luas kepada orang ramai dan memperketat perlindungan untuk pemberi maklumat.

“Undang-undang pengisytiharan aset perlu digubal untuk mewajibkan semua ahli politik dan pegawai awam berpangkat tinggi mengisytiharkan aset mereka dan maklumat itu perlu dapat diakses oleh orang ramai,” katanya.

Tambahnya, Akta Kesalahan Pilihan Raya 1954 juga perlu dipinda untuk memasukkan sekatan terhadap rasuah.